





祭輓彙錄卷十七

祭文

維

康熙五十五年歲次丙申六月己丑朔越祭日甲  
午翰林院侍讀學士加一級愚表弟宋衡率男甲  
午科舉人候補內閣中書愚表姪嗣炎謹以清酌  
庶饗之儀致祭於

皇清誥封光祿大夫內閣中書加十二級景翁老表兄  
先生之柩前曰嗚呼死生彭殤之際達人之所不  
道而於老成之凋謝哲人之云亡輒不禁欷歔太  
息追悼而不能已豈非以其才智千百於人人爲





一世之所瞻仰其生也可敬其歿也可思而不在乎區區存亡之感耶夫以此一人之繫若是其重且大一旦捐館舍先朝露其在海內端人正士名公鉅卿方將持生芻一束千里赴弔至於閭井之門不歌不相扶服而臨寢門者又無論已而況在親串戚好之屬累葉通門之誼其重有傷於此一人者又奚翅歛歔太息追悼而不能已乎此衡於公之即世而不知其涕之無從也余家世與公同里百年來姻婭重疊而余與公中表猶近故公之生平獨余知之最深以余濫厠史館珥筆有年如公卓卓懿行方當大書特書以為法於天下傳於

後世茲方聞訃之初千里遣弔而可無一言先之乎公生逢泰運鍾東南清淑之氣始就傅即以神悟驚其長老弱冠遊學虎林與徐冢宰浩軒同師師並器之以為將來名位不相下也乃公子舍情深不欲以三公易一日之養作而曰不為良相必為良醫能濟時者斯為俊杰方今天下大故在齟政釋此不為而以佔畢博功名末矣况山海之藏敬仲以之而霸齊牢盆之設孔僅以之而興漢由是出其經綸之大麾霍於淮海之間不數年而其道大行傾動一世士大夫之道經淮揚者日往來公門恨相見晚嗚呼方公之謝諸生業而籌畫於



鹽政也人且疑虎林師友之契不必盡符乃公卒  
以布衣謁

天子於行宮碩畫奇猷動

當宁膺人臣極品之榮封光被泉壤垂裕後昆嗚呼其  
可爲人世之殊遭矣吾聞之才過千人者謂之英  
智過萬人者謂之傑矧以國家東南半壁財賦之  
重而綱紀於一人之手此其才其智雖千人之英  
萬人之傑殆不翅過之而公顧指揮談笑出之豈  
可及哉豈可及哉余奉公久見公行事甚悉如孝  
友睦嫻任卹諸媿行無不一一合於古人吾以爲  
猶士君子之所可勉而企獨至其才竊以爲天之

生是使獨已嗚呼此余之所以生而敬之歿而思  
之獨拳拳奉膺而不能已於言也至公未竟之緒  
諸嗣君業能繼續而光大之語云公侯之子必復  
其初繼自今被公之澤者將在天下之蒼生矣尚  
饗



維

康熙五十五年歲次丙申夏四月既望宜祭之辰  
翰林院檢討加一級愚表姪陸紹琦謹以清酌庶  
羞之儀致祭於

皇清誥封光祿大夫內閣中書加十二級景翁項老表  
叔之靈曰嗚呼黃山萃嶽白嶽巉巖篤生名德為  
世具瞻猗惟我公青溪令裔湖海英豪雲霞意氣  
智同少伯讓比叔牙諾齊季布俠邁朱家式廓箕  
裘恢弘堂構大業承先洪基啓後祠新榱桷象列  
几筵義田惇族廣廈興賢誼重睦婣殷勤任郵功  
不施勞德無形色伯通貨廡杵臼定交鄭莊置驛



車騎聯鑣冠蓋盈庭圖書滿屋投轄開樽吟詩刻  
燭鳴珂表里通德旌門

紫泥赤紱顯宗裕昆伯也策名鳳池翔步畫省含香仙  
郎題柱仲兮捧檄佐郡巖疆勲高綏輯績奏循良  
教子服官惟期清白詒厥孫謀急公盡力好施樂  
善晚益不衰倡修學校以育人材天佑哲人宜其  
遐福遶膝孫曾含飴課讀何期春閏運厄黃楊少  
微忽隕南極無光妙悟前因脫然辭世易篲遺言  
胸無一事嗚呼公之德音長在人心公之經濟上  
資國計

朝有崇誥野有豐碑史策家乘終揚令徽所愧鄙人文

慚誦德敬託短章略陳萬一人瑞云遙典型自昔  
酌酒臨風靈其鑒格尚

饗



維

康熙五十五年歲次丙申四月庚寅朔越四日癸巳年家眷姻弟程竣塏嗣立率姪男制攀龍亮儔制茂丹澄制荀龍雲龍伯龍仲龍季龍姪孫如震如需如霖如雷孫如霽等謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項老姻翁之靈而言曰嗚呼翳維姻翁秉茲碩德顯揚前烈休光靡極肇基歛南時當清泰淳熙以來簪纓為最翁父仁厚晚年舉子生而穎異頭角莫比既就外塾沉潛默識叩以大義了了神契志學之年



從師武林冢宰徐公同研文深聞聲遠邇文成利器  
飈舉六翮何難立致乃以咕嗶甘旨莫備業齏  
維揚娛志不匱主持齏務英敏敢爲一時鉅公艱  
大相遺

皇上南巡

天顏咫尺欣逢異數

殊恩沛澤爰以情隱率衆請陳旋邀曠典優渥和春紀  
綱兩淮垂五十載同儕是賴周詳慈藹居家孝友  
乃其天性時歸故山族黨稱慶高曾以上丘墓重  
修立石繪圖百世洪休宗祠崇麗鳩工計萬垂之  
子姓良謨永建在昔牧公講堂闢劃三面滌溪紫

陽題額六百餘年湮沒故址乃於巖嶺構植環水  
族之子姓擇取秀良講肄其中先澤毋忘篤於兄  
弟一情無二殫心營慮克家長世推恩外族休戚  
同之凡民之難忼慨維持平居一室無他嗜好臨  
摹蘇米得其實奧與風晨月夕引觴賦詩高華雄邁  
唐賢擅竒其他言論吐屬經史風規高逸晉人名  
理令子雄才乘時自奮或入薇省或佐名郡凜翁  
嚴訓矢慎矢勤旣稱

帝旨超擢殊勲例獲歸養優游色笑

綸誥崇階先生并耀述翁懿行永宜壽考如何昊天不  
遺一老春情黯黯春雨冥冥行道悲惻聞者涕零



况竣兄弟重之戚黨先兄之逝翁為惘惘翁又逝  
矣吾其焉做令子雲霄諸孫玉樹克昌翁緒永以  
垂裕翁靈不泯翱翔玉清顧茲令裔奕世其禎桂  
酒椒漿蕙餽蘭藉魂兮騁騁雲旗來迓尚  
饗

維

康熙五十五年歲次丙申四月庚寅朔越四日癸  
巳年家眷姻弟方瑛率男晚生雲煥淥煌謹以辦  
香束帛清酌庶饁之儀致祭於

皇清誥封光祿大夫內閣中書加十二級景翁親翁先  
生之靈曰嗚呼翁年逾古稀不為不壽丈夫子四  
洵才且賢或仕於朝或宦於郡或藏器待時於家  
孫曾濟濟皆綽有祖風可謂有後昆矣生於歙老  
於邗經營締造以起其家負淮南北之重望

九重知其名四省慕其義繡衣持斧而來者奉為典型  
而又風流儒雅名重公卿獲受



恩封榮登上壽則翁之溘逝誠哉胸無一事可以撒手  
長行含笑於萬里煙霞之上而予之聞疾憂懼得  
訃悲悼兩旬以來每一念及不禁輟食長歎者以  
予之交翁爲最久又重之婚姻而痛翁之不獲再  
見也憶予兩人初交時步履往來日或一再見稱  
莫逆者近三十餘年其後翁日勞於公務朝夕無  
寧晷予亦杜門謝外事歲不過五六見握手言歡  
兩不欲別自今以往不惟日一再見不可得即歲  
五六見亦不可復得也予其何以爲情耶翁之在  
揚倚賴者固多而忌之擠之者亦不少其兩返故  
鄉也予願其以三面滌溪爲菟裘翁固嘗數數爲  
予言予亦極口贊成之故於其歸也旣喜之抑又  
惜之詎知今日則來焉而不及歸也予遂有惜而  
無喜矣嗚呼予年六十回首故交十不存一契好  
如翁者又復永不相見登堂入室曷勝人琴之感  
哉嗚呼尚

饗



維

康熙五十五年歲次丙申四月庚寅朔越祭日甲  
午年家眷姻晚生程階同弟啓哲鳴率男姪壻崑  
生孫壻華生謹以剛鬣柔毛清酌庶饗之儀致祭  
於

皇清誥封光祿大夫內閣中書加十二級景原太姻翁  
老先生之靈曰嗚呼伊惟我翁令問清邵業在詩  
書樂惟名教惇然其和嶷然其方居三達尊巋然  
梓桑樂善不勸進德靡足悃悞無華布帛菽粟飾  
於內行仁孝恂恂睦婣任卹風誼絕倫門題通德  
堂成逸老藹藹吉人胡不壽考於焉消搖於焉遊



息蝶化鹿藏屨忘帶適春秋佳日翩然命友桃花  
重三菊花重九精研六書委析琴旨曠焉好懷澹  
泊明志世道寢衰江河日下古風斯守誰歟似者  
凡茲懿美人倫之紀圭臬士林表著人耳嗣君克  
家領袖吾黨鶴翥鴻翔聯翩競爽家寶國器蔚為  
時宗垂紳搢笏朝廟雍容方憑福履以茂榮暉豈  
期奄忽道山是歸嗚呼哀哉嗒等誼屬通門夙忝  
世契泊以絲蘿情尤洽比歲時過從德音孔咸乃  
授几席乃親丈函蒙求之義從容笑語匪直飲醇  
亦飽儀矩天不憖遺永隔泉路總帳高張素車奔  
赴塗悲巷泣春杵斷停邦殄平格鄉喪典型嗚呼

古今共盡奚足傷盡惟其令名有永無斁嘉蔬明  
水侑以蕪詞翁如平生尚其鑒之嗚呼尚

饗



維

康熙五十五年歲次丙申四月庚寅朔越祭日甲  
午年家姻晚生原任浙江分守金衢嚴道布政使  
司叅議程鑾候選知州程振基癸巳科進士充  
武英殿纂修官候補主事程崧歲貢生程鍾謹以  
剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太姻  
臺之靈曰嗚呼人之哭其儕友與哭其執友其情  
孰多乎哉昔吾先子之交於太翁者蓋數十年矣  
出處必偕聲歎相應殆二人同心而不可缺一者  
也歲庚寅先子自閩歸翁先時返里先子寢疾臥



簣者累月時時顧子姪之在旁者詢曰項子來否  
應曰未也即蹙然以思及綿綴之際語絕不及家  
事復揚聲問曰項子得無來乎氣旋絕嗚呼先子  
可謂知翁者矣夫人生際彌留無兒女繫戀丁寧  
悽惻狀獨拳拳千里故人而自傷未一執手也所  
謂死別吞聲其何如也耶翁與先子同年生月日  
加長焉以兄事翁鑿與諸弟執猶子誼甚勤因與  
翁仲子締秦晉之好嘗侍翁得親吐屬翁之刮目  
也與先子在時無異鑿竊慨先子即世諸戚老凋  
謝方將祝翁以長年爲兩淮持綱領也孰謂長者  
淪喪而令後生小子皆失其典型耶嗚呼已矣鑿

之哭翁也爲執友哭也爲執友哭則猶之乎臯魚  
之淚也而今而後吾知翁且下世與余先子復申  
舊契抵掌而談當世之務一如生前激昂慷慨詩  
酒論心庶幾九泉之下其不落寞矣乎徒令鑿輩  
攀躋無從惘惘焉其若有失也亦獨何哉雖然生  
寄也死歸也死而無所紀於人世以使世之人見  
思與草木同腐何異而翁交遊滿天下公卿之間  
爭相折節交口延譽豈無因而致此歟巡視江淮  
大吏繡衣持節必倚翁爲重其殊禮必有由

翠華南顧獻書陳策爲同人先

天子樂之賜賚過於僚案此之受知寧有倫比至若創



宗祊敦睦族仰以舉火者且數十百人而藉以婚嫁者亦如之藉以封樹者亦如之處心積行一以叨倫敦本為歸則翁之德澤在人為有益於鄉閭者大矣翁其可以死乎哉坡公云惟文章為不朽與有子為不朽翁之子若孫羽翼王國咸抱經世之略自宜彪炳中外以續翁未竟之緒其設施尤未艾翁且逍遙上征含笑於白雲之上也其真毫髮無遺憾矣乎吾故以前之所哭者為致私怨於上天以傷父行之不再而以後之所哭者為鄉國折柱石以哀哲人之凌替也嗚呼哀哉尚

饗

維

康熙五十五年歲次丙申四月庚寅朔越四日癸巳誥封奉政大夫年姻家晚生期李上德率男河南彰德府通判加二級紀錄四次姻晚學生期李夢熊候補儒學教諭姻晚學生期李夢蘭謹以剛鬣柔毛清酌庶饗之儀致祭於

皇清誥封光祿大夫內閣中書加十二級耐菴項太親臺先生之靈而言曰嗚呼人之生也貴能開物成務如春風風人夏雨雨人而後先長譽自足以表祿於世乃一旦隨化歸盡此固不必屬在親知凡聞聲相感莫不為之歎息而况交之以金石重之



以婚姻能不追維往昔發無已之悲也耶維翁簪纓世胄生而穎悟弱冠遊學武林與徐冢宰同師致大聲先輩出試屢冠其曹念堂上春秋高家中落竊歎曰功名命也昕夕伊唔而使甘旨缺供可乎因棄帖括頰首挾齋策每一籌畫洞中肯綮淮上業齋者引以為重而復文采動人為時流所推憶御史裘敬亭先生出余壽陽師之門歲壬戌奉命督齋兩淮得晤翁於衙齋聆其緒論心儀久之嗣館於平山師署中又得申舊好後余應扶風大司農聘攜家北上翁之甥竹溪余表兄梓國銀臺之弟也相晤於京師更得悉翁之生平維時齋政委靡征輸莫繼翁甚為焦心屬竹溪備述商困余屢於扶風西公哈納兩閣老退食之暇語及淮課因得備言其事後

皇上南巡翁首列名具本陳奏以及奏銷免費屢邀浩蕩之恩抑知翁竭力維持非一朝一夕之故乎余既雅重翁適見令孫藜光課藝精悍出羣因以小女字之情好愈篤孰知天年不造未克底其成立命也如何憶余自京師歸與翁嘗相往還謂余曰予自治齋務諸當路皆蒙獎借得以粗為方幅然予老矣先世松楸殊為繫念幸得修築繪圖以傳久遠又宗祠支祠皆煥然維新而先世牧公讀書處



朱子曾過訪顏其堂曰三面滌溪世久湮沒予相  
其地形爲之重建俾六百年之基宇照耀人目此  
所快心者余曰翁各事皆已就緒令子皆冊名天  
府孫曾滿前能繩祖武顧余抱病生計未有涯涘  
可奈何翁情意慇懃謂蕪陰一席可使兒子共事  
知己之言實佩服於心豈期余病已瘳而翁偶一  
示疾遂爾巫醫息意也乎今已矣無可如何矣素  
車白馬而來者不絕於路矣獨晚之知交實有出  
於恒情之外敬陳一卮敘其顛末翁仍能鑒其情  
而式飲庶幾乎嗚呼哀哉尚

饗

維

康熙五十五年歲次丙申閏三月辛卯朔越祭日  
丁丑年家眷姻晚生王光裕率男姻晚學生一元  
孫壻應元謹以剛鬣柔毛清酌庶饗之儀致祭於  
皇清誥封光祿大夫內閣中書加十二級景翁項太親  
翁老先生之靈而言曰嗚呼論交於今人之中求  
其束髮相知皓首而不淪者有幾人哉讀伐木嚶  
鳴之什旣深人以契好之思誦谷風陰雨之篇又  
增人以反覆之慨交道之難延至今日江河趨下  
愈有不堪言者若余之於太翁始而篤以交情繼  
而申以姻誼數十餘年歡洽無間是蓋求之今人



中百不得一者也一旦興懷老友遂成隔世追維疇昔之下悲從中來豈僅如尋常之墮淚含哀已哉憶余之來邗上也時甫髫齡而太翁少長於余相見於儔人之中片時晤言遂有針芥之投自後晨夕與居親暱既久微窺太翁之氣宇側聞太翁之談吐嘗握手而告曰以君之言論風采迴邁恒流固知將來樹立振家聲而光前烈可無季主而決也而太翁亦撫余背而言曰君質慤厚重發祥自永吾之所以結契者亦立乎今日以下他年也兩人相視莫逆於心遂以異姓兄弟訂為永好每當春花秋月杯酒為歡舉凡往古之得失時事之

權宜俱有以發抒其蘊蓄之奇而出人意表之外然卓識既高而虛衷益下事無鉅細必就余商略余亦竭誠以告至余有所諮詢則計畫規度其足以啓發余之聰明而彌縫余之罅漏者十居其九迨余有漢臯之役南鴻北鴈音問無虛蓋繾綣之懷不以異地少疎而纏綿之意較之相逢倍切既又念兩人相交密矣相知深矣必更深以婚媾之誼俾子若孫輩篤為世好因屈指而計以余次子與長君之媛年齒相若遂為姻婭去年春余自楚江返棹後聚首經年竊見太翁氣足神王視聽步履不少衰方謂漸臻期頤優游蔗境何圖徂冬一



病遷延春間日以加篤彌留之前二日余造候於  
牀第間尚執余手謂天假數年將結伴而還故鄉  
懇懃眷戀此情何極不謂言猶在耳倏然長逝目  
擊心傷寸懷欲斷念太翁以杖國之年躬膺

天朝寵命而長君薇省揚鑣聲稱久著行看粉署含香  
國計攸賴次君佐郡延州軍民胥戢將見絳節朱  
幡虎符重鎮三四兩君業已蜚聲上國佇瞻雲路  
騰驤况孫曾輩玉立森森盡屬家駒國寶一堂四  
世旣賢且貴是太翁騎箕長往脫然無所繫快然  
無所累抑亦可以含笑於九京矣獨余之展轉悲  
痛不能自己是用和淚爲文哭奠靈几惟述數十

年之交誼又申以姻好以見我兩人始終不渝之  
意至太翁庭幃之內純行可風淮海之邦芳聲丕  
振德隆而業茂恩溥而澤弘其照耀於人寰者自  
有如椽之筆闡揚盛德固不俟於余之殫述也嗚  
呼言有盡而意無窮淚旣枯而神愈感太翁有知  
自應冥鑒而歆此一觴哀哉尚

饗



維

康熙五十五年歲次丙申四月庚寅朔越四日癸巳姻晚生江瑞承玠承瑜率姪晚學生允暉謹以剛鬣柔毛清醑庶饗之儀致祭於

皇清誥封光祿大夫內閣中書加十二級景翁太親翁之靈曰嗚呼昊天不弔人之云亡雖年踰古稀席豐履厚所以獲祐於天者未嘗不盛然望隆當世德重鄉邦一旦如飈逝星流不可復覲雖行道之人莫不潛焉出涕而况交堅金石誼切絲蘿謂能已於懷耶惟我翁系本新安望族清華世胄不數王謝迹其總角之時岐嶷英邁磊犖不群與先君



子把臂論文稱爲莫逆厥後僑寓維揚地近情密  
契好有加剪韭言歡雄談霏乎玉屑挑燈說劍浩  
氣壯乎斗牛其經營諸務必以利人濟物爲心殷  
然胞與之念世莫不奉爲楷模群相矜式因重之  
以婚姻以姊氏于歸仲君朱陳之好益篤數十年  
來字雅契合初終靡間不幸先君子見背瑞等苦  
凶餘生煢煢在疚翁以恪守前猷毋墜家聲爲訓  
瑞等奉以周旋惟恐隕越方期常欽德範仰爲典  
型奈何天柱西傾老成頓謝耶哉翁之爲人剛毅  
有斷正靜無私出一言人莫不信立一議人莫能  
違他若仁孝本於性生愷惠周於閭鄙和以待人

寬以馭下解紛排難不減魯連之風崇樸黜奢寧  
效齊嬰之儉事之照人耳目者未可更僕數宜乎  
積善餘慶佑啓後人長君效職予明仲君佐理煩  
劇恪遵庭訓政治昭彰叔季文采斑斕而待扶鵬  
翼諸孫繩繩振振盡是荀龍薛鳳之英將來之福  
祿天申者正未有艾翁亦可含笑於九京而稱全  
福矣獨是瑞等自先君逝後聆翁之誨如見先君  
焉今總帳空縣音容莫接能不悲哉嗚呼遼鶴云  
送不返令威之室子規猶在難呼蜀帝之魂薄具  
生芻敬抒哀悃翁靈有知其來格耶尚  
饗



維

康熙五十五年歲次丙申四月庚寅朔越四日癸  
巳年家眷姻晚生馬謙勳偕姪男姻晚學生曰楚  
曰瑄孫壻曰璐謹以剛鬣柔毛清酌庶饁之儀致  
祭於

皇清誥封光祿大夫內閣中書加十二級景翁太親翁  
之靈曰嗚呼我翁德隆望重凡遠邇親疎蒙其惠  
者無不祝其永享安康克臻上壽今何遽棄人世  
長往不返耶晚誼切葭莩問天莫應悲悼之餘氣  
結難言然其生平懿行有晚所深知而難忘者不  
能不一言也翁性純孝事兩尊人色養承歡顯揚



祭軒輿錄卷之五  
三  
為亟故祖若父皆膺一品

榮封其心猶歉若未盡推而新祖祠創家廟購遺像繪  
墓圖敦本追遠何莫非孝思之所暨哉而又好行  
其義族姓貧窘者衣之食之婚喪不克舉不待告  
而已代為綢繆秀良有造者資膏火以勵其成有  
能操竒贏熟會計者則量材授事俾無失所自一  
本至九族受庇者指不勝屈也若夫歲饑施賑所  
全活者動以萬計吾鄉郡學傾頽近猶寓書當事  
願輸金襄事卜吉鳩工其樂善不倦大率類此學  
問悉有根柢子史百家靡不貫通為詩古文詞援  
筆立就字摹晉宋諸賢卓然成家才優利濟未獲

致身

朝宁一展其才為兩淮經理齟務四十餘年洞悉諸弊  
毅然率同人迎

鑿陳奏寵荷

宸章克食之賜兩淮疊蒙

皇仁家殷人足感浩蕩之恩者未嘗不咻噢我翁之德  
也晚同業淮鹺久獲履覆兼與長君經翁訂婚姻  
之好情關休戚而痛翁之長往不返烏能不搔首  
問天傷心淚竭哉嗚呼遺範具存音聲宛在藉茲  
簞簋荐我椒馨仰邀慈鑒庶幾來格尚

饗



維

康熙五十有五年歲次丙申四月庚寅朔越三日  
壬辰年家眷姻晚生洪如旦年家眷晚生制吳文  
輝談訓洪弘量曹寬制江學吳公洋程挺江永堂  
馬亮李義元制汪元廕吳文烜期汪鴻儒謹以辦  
香束帛清酌庶饗之儀致祭於

皇清誥封光祿大夫內閣中書加十二級景翁項太翁  
先生之靈而言曰嗚呼國萎哲人山頽喬嶽珠斗  
芒寒穹蒼氣薄百尺之桐朝靡箕尾之星夜落襄  
陽耆舊悼矩範之無存江左風流歎儀型之闕若  
乍聆訃而撫心忽聞哀而驚愕蓋老成凋謝固同



志之所興悲而有道云亡尤後進之所靡託聲因於悒而不成管以哀傷而難握緬我太翁先生籍本新安族振維揚聿修世德家道克昌少操翰觚即已馳聲於鄉國長遊膠序何難起草於明光顧乃兼詩書以肄業操竒籟而稱商此特太翁先生縱遊戲於薄技逞竒能以爲良者也以故魁雄節概爛如星日之懸磊落襟期浩若江河之蓄慷慨而濟危急每笑末俗之沾沾鄭重以表風規不隨人情之碌碌道貌可親風裁足畏又况謙以持躬和以處衆事親盡愉婉之誠睦族式友于之誦篤通家之世好無殊星聚陳荀萃風雨之交游不啻

冠彈王貢邇來忘懷物外惟假嘯傲以長年任事寰中必曰寧靜而安命雖染沉疴猶然勝致操藥以辦耆黃焚香而咨刪訂杜門謝客臨行楷於米蘇抱膝長吟謀篇章於李杜據梧而樂志含飴以怡情我經翁諸年翁先生養志承歡箕裘矩矱五色燦醴陵之管席陳架筆珊瑚一卷授瑕丘之經庭列入雲寶樹總由家學淵源快睹珪璋之特達而且世傳弓冶自培蘭桂而揚芳晚等誼切戚交情深景仰每獨識其高風嘗共窺其通朗方擬期頤以爲年遽賦玉樓而長往追令德而咨嗟懷遺音而結想嗚呼梁木傾摧昊天渺漠霜淒淒而飛



筵霧冉冉而凝幙雪縞千峰風悲萬壑求之今世  
誰至性之肫肫邁之古人孰高風之嶽嶽卜五世  
其必昌痛九原之不作有蔬載寧有酤載酌聊一  
痛以陳詞冀神明之來格嗚呼尚  
饗

維

康熙五十五年歲次丙申四月庚寅朔越五日甲  
午年家姍晚生期洪元獻謹以剛鬣柔毛香帛庶  
饗之儀致祭於

皇清誥封光祿大夫內閣中書加十二級景翁太親翁  
大人之靈曰嗚呼九老爲圖以繪四皓作曲而吟  
此非才藪是爲德鄰洵千載之共仰其範至今日  
而誰擬其倫惟我太親翁生四皓九老之後我欲  
於中而續其人嗚呼嚬懷翁之爲人久矣猶能潑  
墨而寫其風神德滋於樹福培以根秀其姿而雅  
其度善其氣而藹其情色不必莊而論未嘗不篤



骨不必傲而志未嘗不貞其供堂上也莫訝殺雞  
之獨饌其誠膝下也無妨刻鵠之不成敦義明信  
恤孤憫貧奚煩乎千金之盟而言乃踐其奚計乎  
萬金之償而券已焚德歸酒頌品入茶經書第過  
目詩最鏤心迹雖寄乎膠鬲趣自協乎淵明光每  
韜乎潛德名已著乎御屏宮袍畀於光祿

宸翰酬其乞言經濟補於齷政咨訪重於巨卿挹其清  
塵固逢人之徧說即其錦製尤歸鄉之特行然而  
人爭誇其譽望翁自忘其寵榮是以厚嘗反乎公  
侯之壁薄不棄乎邨野之芹薰風一曲長日一枰  
時而携竹鑪於半山之閣時而飛羽觴於曲水之

亭漏已殘兮猶縱橫於月夕影將亂矣尚留戀夫  
花晨嗟乎名韁利鎖潦倒風塵誰能停舟而盼雁  
誰能携酒而聽鶯而翁已浩浩落落獨快乎春山  
秋水之登臨遇之者不辨客自何許而識者已決  
其爲謫仙中人德與年俱進福與時並臻宜其束  
帛加璧安車蒲輪何嘗世競於蒼生之雨而天公  
忽隕乎少微之星若夫詢其繼起叙厥后昆或典  
禁闈或領宣旬或正經如孫奭或奪席如戴憑叢  
叢蘭樹枝枝桂林美春華而羨秋實行將光芒萬  
丈相輝於

天子之廷此前後賢之相望又何恨乎九京嚙帡幪久



託謬忝朱陳哲人云萎頓失典型冷落蘇門之嘯  
沈沒富春之綸今日清和節屈宴會筓櫻安得翁  
望我於竹西歌吹之下聽其高談雄辯爲之擊節  
而開襟薄勺兮竹白菲薦兮芻青臨風一酌遙望  
平山雲樹低徊留之不能去云嗚呼哀哉尚  
饗

維

康熙五十五年歲次丙申四月庚寅朔越祭日丙  
申年家姻晚生洪國傳偕男在制愚姪孫壻必理  
晚學生必璋謹以清酌庶饁之儀致祭於

皇清誥封光祿大夫內閣中書加十二級景翁項太親  
翁之靈而言曰嗚呼我翁生於名族負異才讀書  
不爲章句獨慕古人高節偉行視世俗屑屑無足  
動其意者少遊維揚與先伯兄友善數數過敝廬  
當是時公尚未有所試而先君一見輒不禁傾倒  
深相引重乃謂伯兄曰我閱人多矣率沾沾不足  
道惟項翁生於禮義之邦漸於詩書之澤器度闕



深汪汪千頃殆未易量他日功建事立必爲兩淮  
砥柱因以家姊歸於長兄經士締永好焉翁以廊  
廟之材俯而屈就齟筮雅非其尚然宏猷卓識洞  
徹齟務源流上及口岸疏銷下及各場利便一切  
揮斥區處無不曲當是以功被兩淮名達

宸聽當事重其才德領袖諸公而不知翁之角立傑出  
先君早於傾蓋立譚決其非常人矣厥後先君棄  
世不幸家遭多故翁往往爲出絕力百方調護還  
於無恙即今海隅風氣非復昔時綢繆蟠固用意  
彌深翁可謂純德君子矣昔張元伯謂郅君章殷  
子徵爲生友而以范巨卿爲死友嗚呼若翁者不

以生死渝情寒暄易轍其殆先君子之死友歟傳  
幸蒙先人餘業託處海濱地當榆道轉輸之所自  
出翁以至戚之誼慇懃相屬豈非古道照人誼有  
終始者耶嗚呼翁與先君敦好時<sub>得</sub>方髫髻忽忽  
數十年俯仰盛衰追維夙誼未嘗不以之興懷孰  
意曩爲先君慟者今傳又轉而慟翁矣嗟乎日月  
如流耆宿漸盡傳等忝世好之末久居厦庇之中  
對此茫茫百端交集未免有情能不黯然而抱無  
涯之戚也哉臨風隕涕百折腸迴靈如不昧冀鑒  
此意哀哉尚

饗



維

康熙五十五年歲次丙申四月庚寅朔越三日壬辰年家姻晚生胡嗣廣謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太姻翁先生之靈而言曰嗚呼典型既謝悲仰止之無從文獻云亡悼音徽之難覲况乎分投葭末世篤蘭交登子敬之堂杳如隔世聽山陽之笛宛若平生有不咏梁木而神愴賦楚招而心慟者乎惟我太姻翁歛南望族練水高閣秀挺黃山識前生之金粟德高白嶽標當代之龍門筆筦花生楊殿學



之珠圓玉潤墨池波躍董尚書之鐵畫銀鈎寧獨  
兩淮之祭酒實爲四國之羽儀廣夙叨世講久切  
儀型謬蒙不棄葑菲永託薦蘿方慚齊鄭非儔可  
以常聆塵教孰意朱陳世好遂爾倏赴修文耶嗚  
呼太姻翁立身行已堪配古人嘉言懿行可傳後  
世承歡膝下定省無違眷慕松楸春秋罔缺志慮  
不忘一本必豐足而後克安寢食每念遺孤必生  
成而始稱快此固其錫類以克孝因心而爲友也  
若夫丹腹宗祠翬飛寢廟築濱河之大堤免昏墊  
之災建滌溪之講堂有肄業之地此其尊祖敬宗  
敦本睦族爲何如也至於贖已鬻之子女清戚屬

之先塋延旣絕之宗祊修郡庠之聖宮誅鋤凶暴  
保全善類則又德在儒林功崇名教者矣所以名  
公巨卿一見傾倒封疆大吏咸願納交以至得覲  
天子之顏欣承

宸翰之錫藉非太姻翁盛德在躬榮問休暢曷克臻此  
至若本家庭之燕翼爲邦國之謨猷荀氏八龍無  
非騏驥謝家三鳳不減超宗身居內史薇垣之制  
誥日新職在監司旬宣之膏澤疊沛諸文孫才翻  
江海學貫天人芙蓉闕下驚傳五色之雲翡翠窗  
前盡視三千之草固知河流千曲總本星源鳳采  
九苞悉由丹穴宜乎



龍章疊下恩分太一之波沆露平分榮出西清之贈方  
期伏生年老長策蒲輪轅固書行永攜靈壽奈何  
箕騎天上仰南極而無輝玉著土中訪東園而絕  
跡嗚呼昔范文正之即世也蘇子瞻敘其文而興  
悲許文正之仙遊也揭奚斯錄其事而隕涕况乎  
分投葭末世篤蘭交如廣者乎覩素旂之搖曳嗟  
靈旒之飛揚薄陳一奠長痛寢門惟公有知庶其  
昭格尚

饗

維

康熙五十五年歲次丙申四月庚寅朔越三日壬  
辰年家眷姻晚學生閔巘晚生閔捷盧文熙談訓  
曹寬陳雷吳銓程進江學申仕渭程挺汪元廕江  
訓等謹以瓣香束帛清酌庶饗之儀致奠於

皇清誥封光祿大夫內閣中書加十二級耐菴項太翁  
之靈而言曰古君子之可法可傳者出與處相若  
也出則身居朝廷而勲業被天下處則身居閭里  
而名實亦滿人間相持而論隱顯無不同然而難  
易則有辨蓋藉勢乘權者其力易而不階爵位之  
崇不藉禁令之便其為力難而獨能恢弘抱負君



國倚以為重為宇宙間必不可少之人此則稽之  
往古未易數數指數而考之當今惟太翁為無憾  
也太翁姬周之苗裔先世再遷而居歙南科第之  
盛歷數十傳矣太翁聰明特達功名如拾地芥耳  
以太封翁春秋高不欲違膝下遂棄舉子業而修  
鹽菹一出而聲名藉甚遂已雄長江淮當是時齟  
政紛如上下頗不得要領太翁發言建豎力持大  
體興利除弊先後齟使皆以國士待如是者五十  
年東南財賦重地而齟為最上供軍國之需下甦  
商民之困太翁之力居多此東海徐公文恪高公  
所以折節納交而

聖天子南巡眷顧優渥錫賚頻仍也令太翁登朝顯仕  
席便利之任其名實又當何如哉夫才略過人者  
根本必厚太翁色養二親終身不懈至今終猶孺  
子慕無已時也推愛親之意以恭從父從父十人  
無間言又推之以敦族姓推之以廣結納輕財尚  
義之舉不可勝數而尤惓惓盡力者則宗祠大建  
而妥列祖極品逮封而顯三世皆孝思之至極也  
若吉地示於夢中祖像獲於意外其誠孝感通冥  
漠矣所謂根本極厚者此也象賢繼踵掌絲綸治  
劇郡以愛日之故解組暫歸勲爵日進而上  
封典亦日進而增叔季兩公皆如是焉至於孫曾繞膝



濟濟跼跼爲家之慶行爲國光詩云俾爾熾而昌  
俾爾壽而臧皆天之所以篤厚太翁也舉世仰之  
以爲景星慶雲其名實之著聞於齷政者特一事  
耳勢處其難而太翁舉之甚易猗歟盛哉而忽焉  
哲人萎謝宜咨嗟痛悼者之衆也然而綜計太翁  
之生平福祿壽考即身列

朝廷者往往不逮太翁雖殞猶存而又何悲白駒之騁  
决隙薤露之不崇朝乎嚬等誼忝葭莩分居後進  
一觴一豆用竭哀誠神其鑒之尚

饗

維

康熙五十五年歲次丙申四月庚寅朔越三日壬  
辰年家眷姻晚學生制許弘溥偕弟期弘演弘濬  
率男功述岐述鎬述豐謹以剛鬣柔毛瓣香束帛  
清酌庶饗之儀致祭於

皇清誥封光祿大夫內閣中書加十二級耐菴老太姻  
翁老先生之靈曰嗚呼溥自今不復覲公之儀範  
矣憶溥甫離襁褓每逢祖父接見賓客常追隨左  
右其時即獲瞻山斗荷翁撫摩珍愛成童以後又  
復飲食教誨之屈指歷三十年於茲矣公一旦捐  
棄館舍海內之人莫不驚悼矧溥屬在葭莩更列



於祖父數十年交好之未能不悲從中來歎歎而泣下也哉公爲吾歛閱世胄元魁科第絡繹不絕山川靈秀之氣萃於我公少負絕俗之志經世之才來遊揚州見其闐闐爲水陸都會乃一試之鹽筴稠人廣會冠蓋駢列當群言沸羹之際公以片語劈分洞中肌理兩淮奉爲典型督鹺使者皆先後推挹折節禮重公與祖父生同時事同濟意氣相投綢繆款洽幾無間晨夕也乙亥初夏先大父應高大中丞之召羈粵六載均有離索之感庚辰返揚握手言歡公以交情敦篤雅意聯姻先大父遂以溥之冢妹字令孫修渠溥喜弱妹得侍重

慶之下十餘年公情義勤懇歡好更篤客秋重九公與先大父煮茗清話期以佳園桂放效平原十日之歡溥侍座隅私心竊喜謂公與大父雖高年尚神清氣爽詞雄意勃從此臻耄耋享期頤俱方來而未艾不料先大父於季冬見背溥慘勝屠腸孤露莫解正藉公以爲矜式自冬徂春曾幾何時公復忽焉長逝何兩家後先罹此不幸也嗚呼公之儀觀淵停嶽立公之事業麗天揭日公之聲名遐邇洋溢公之崢嶸極品

天錫閭里頌美姍親式德敬製蕪言以告心惻俯仰白雲旁皇淚溼酒清殺馨靈其來格哀哉尚



饗

維

康熙五十五年歲次丙申四月庚寅朔越祭日甲  
午愚孫壻程良瓊率男外曾孫廷詔謹以剛鬣柔  
毛清酌庶饗之儀致祭於

皇清誥封光祿大夫內閣中書加十二級耐菴項公尊  
太岳大人之靈曰嗚呼公之捐館而仙逝也瓊在  
漢上聞訃悲哀寢食俱廢東望廣陵有淚如霰憶  
前春南還得拜庭下見公之起居康勝神明湛然  
竊欣幸之以爲耄耄期頤可坐而致我岳父及叔  
岳祿養之隆洵受

朝階用徵德崇祚永之理叩別以來每懷瞻覲而任事



楚中所願未遂特於家郵往復殷勤問訊幸眠食  
平善視履安和今春忽聞微恙心竊慮之復念平  
日彊健恃以無恐且其福德深厚報施必不止此  
日望好音之至紓我遠忱奈何星隕少微峯摧泰  
岱遂捐館仙逝距前春叩別時僅踰三載而即此  
叩別數言遂成永訣也嗚呼慟哉瓊以謏劣庸才  
辱在甥館我岳父承公之意視瓊有加十餘年來  
恩禮優渥猶憶先君薄宦海南稅駕邠上荷公特  
達之知逾於等倫許結朱陳實緣高厚當先君病  
革之際敦迫完姻俾見子婦先君感之嘉禮甫成  
旋即見背公憫瓊失怙撫之慰之恩同顧復始則

勉之以勤學繼則喻之以治生訓迪周詳篤愛靡  
已今得涉歷世務稍能自立者咸公與岳父裁成  
之教也戴德若此報稱無由旣未能努力清途上  
副期望之切又未能光昭弘業仰酬造就之心茲  
並問安侍疾視含視殮之禮而失之且不能俶裝  
奔赴肅拜總帷之下悼衷負疚尚忍言哉爰申哀  
誄之詞遙展瓣香之奠尊靈不昧祈鑒微誠至於  
駿德豐功鴻名偉望榮施三代階崇極品朱紱方  
來之慶

龍章疊贈之恩則鉅公碩彥能言之而非瓊卑幼所敢  
贅也嗚呼哀哉尚



饗

祭輓彙錄卷十七

祭輓彙錄卷十七





